


*Nasihat, Filsafat,*

*Adat*





- 193 Tangkap ikan di Selat Melaka,  
Dapat tenggiri orang membeli;  
Santun bukan boleh direka,  
Pembawa diri sejak azali.
- 194 Terkapar-kapar mata berbinar,  
Kerana luka terbubuh cuka;  
Mulut celopar lakunya honar,  
Kawan tak suka Allah pun murka.
- 195 Atas loyang kuih keria,  
Makan ia di kebun jati;  
Siapa yang dibenci manusia,  
Pasti dia akan disakiti.
- 196 Pokok peria berbuah jarang,  
Dipetik budak sama cendawan;  
Tiada setia padanya orang,  
Jika tidak memiliki kawan.
- 197 Orang Kedah asyik berzanji,  
Bercahaya pelita cerah ceria;  
Kalau sudah membuat janji,  
Mesti dikota tanda setia.
- 198 Duduk bermadah tidak bertangguh,  
Hatinya cecal menghadap Raja;  
Usaha sudah bersungguh-sungguh,  
Doa tawakal pada-Nya sahaja.
- 199 Kerbau sapi sama jenisnya,  
Berkubang di paya di panas terik;  
Serapah jampi kurafat namanya,  
Mengamal ia mengundang syirik.

- 200      Pak Jenal mengerat palas,  
            Tertusuk duri padanya diri;  
Apabila beramal biarlah ikhlas,  
            Baru diri pahala diberi.
- 201      Gula melaka pemanis bubur,  
            Dimasak suri juga keria;  
Jangan suka bersifat takbur,  
            Hinanya diri di mata manusia.
- 202      Pak Hadi sama Mak Tinah,  
            Mereka hendak menanam lada;  
Kalau berbudi padanya tanah,  
            Rugi tidak untungnya ada.
- 203      Ambil galah jolok pedada,  
            Terjolok cipai bagai diuji;  
Kalau mengalah berpada-pada,  
            Jangan sampai dihina keji.
- 204      Beli serkap di Pekan Kerpan,  
            Sebilah parang pula dicari;  
Kalau bercakap biarlah sopan,  
            Baru orang memuji diri.
- 205      Pesan laksa di Pekan Rabu,  
            Makan bertiga petang hari;  
Berbuat jasa kepada ibu,  
            Allah menjaga takwanya diri.
- 206      Pagi hari memetik duku,  
            Harinya terang penuh ceria;  
Jauhkan diri bersombong laku,  
            Barulah orang memandang mulia.